




LIMBAS

“Filosofia de logu” per decolonizzare il pensiero

di MAURU PIREDDA
a pagina 30



Unu libru colletivu

Su volùmene imprentadu dae **Meltemi** est essidu dae pagas chidas Unu traballu mannu e nou de autoras e autores contivigiadu dae Sebastiano Ghisu (Tàtari) e dae Alessandro Mongili (Pàdua)

Filosofia de logu cun ogros sardos

de Màuru Piredda

Est essidu dae pagas chidas su libru *Filosofia de logu. Decolonizzare il pensiero e la ricerca in Sardegna*. Contivigiadu dae Sebastiano Ghisu (professore assotziadu de Istòria de sa filosofia in s'Università de Tàtari) e dae Alessandro Mongili (chircadore, insegnat Sotziologia generale e Protzessos de modernizatzione e Tecnoiscienza in Pàdua), su volùmene imprentadu dae **Meltemi** in sa collana sua "Linee", lompeta a libreria a pustis de belle un'annu dae sa fundatzione de su colletivu omònimu.

«Est lompida s'ora pro chi in Sardigna nos abbaidemus non prus cun ogros angenos, ma cun sos nostros». Gasi comintzat s'istèrrida iscrita a bator manos dae Ghisu e Mongili.

Deretu, tando, est a lis prongontare: comente est chi, intre subalternidades e mitos, nos devimus torrare a pigare sa mirada nostra?

«In su traballu nostru e in su de totus is autoras e autores ddoe at unu filu ruju chi est su de nche mòvere s'interessu dae s'identidade a sa cunditzione de sa Sardigna. Sa castiada nostra duncas no si nde depet pesare dae un'origine, dae un'ontologia de su de èssere sardas o sardos, ma dae is protzessos in ue sa vida nostra esistet. Custa cunditzione, e custu est su puntu chi ponimus in custos traballos, no est sa de s'arretradesa, ma sa de sa subalternidade. S'arretradesa, a contu suo, no est figia de un'identidade sarda unica, ma est efetu de su domìniu de tipu coloniale chi sa Sardigna at sufridu, in manera particolare a pustis de su 1799. Is mitologias "sardiscas" sunt medas, e tenent su sentidu issoro, ma a nois interessat de prus a ddas decostruire chi a ddas bantare».

E duncas pro custu chi serbit unu pensu filosòficu nostru? E pro nche lompere a ue?

«Unu pensamentu nou serbit, ma no depet èssere imaginadu che a una metafisica noa. Is categorias analiticas depent nàschere dae s'istùdiu de sa cunditzione nostra, no depent èssere importadas. S'interessu nostru pro is istùdios postcoloniales e decoloniales naschet dae sa proposta de "provintzializare" sa Terramanna, pro nois duncas mascamente s'Itàlia; est a nàrrere de nde bogare a pigiu cuntzetos chi tèngiant fundamentu in sa realidade sarda, pro dd'ispiegare, e no a istòrchere sa realidade sarda pro dda frichire in ischemas cuntzetuales agenos».

Cantu podet èssere de agiudu, in custu caminu, s'impreu de sa limba nostra?

«Meda de seguru, ma esistet su problema, mescamente, de sa pagu cunfiantzia de is intelletuales cun sa limba nostra e de sa farta de unu pùblicu istudiadu e sardòfonu. Nois amus postu sa chistione, e bolimus andare a in antis pro elaborare limbàgios e còdighes chi permitant de iscriere in sardu. Tres annos faet, cun su libru *Sa dòpia ferta*, s'assòtziu Acordu at fatu una prima proa de iscriere de sotziologia in sardu. Sa chistione est chi mancat distributzione, unu pùblicu istudiadu, e totu su dispositivu acapiadu a una produzione intelletuale sardòfona».

Cale modernizatzione proponides pro nche bortolare su paradigma attuale?

«Tocat a èssere criticos meda in contu de modernizatzione pranificada. A pustis de su Pranu de Renàschida, chi nde fiat sa declinatzione sarda, nos depimus istesiare dae custu bisu noeghentescu de unu Pranu de Renàschida nou. Ca est perigulosu».

Su colletivu bostru nch'est conca a un'annu de atividade. A pustis de custu libru cales sunt sas àteras punnas in programma?


«Iscriere de prus in sardu.

Amus a sighire cun is atidades de chirca, a aprontare seminàrios pro espònnere is resurtos e a nos cunfrontare cara a cara cun totus chirchende cantas prus persones. Pensamus finamentas a unu grupu de chirca pro comintzare a fraigare su sardu comentelimba filosòfica».

In prus de Ghisu e Mongili, sos àteros autores sunt Giada Bonu (dotoranda in Iscièntzias políticas e Sotziologia), Gianpaolo Cherchi (dotore de chirca in Filosofia), Alessandro Derrù (dotore in Iscièntzias istòricas e filosòficas), Omar Onnis (chircadore indipendente), Riccardo Onnis (progetista), Federica Pau (dotora de chirca in Estètica e Teoria de sas artes), Cristian Perra (istudiosu indipendente), Andria Pili (istudiosu indipendente) e Cristiano Sabino (insegnante de Istòria e Filosofia). Su libru est partzidu in tres partes: Ideologia; Provintzializare s'Itàlia, Paesàgios e pràticas de sa subalternidade.



Alessandro Mongili



Sebastiano Ghisu

**Sas àteras punnas?
Amus a sighire cun is atidades de chirca, a aprontare seminàrios pro espònnere is resurtos e a nos cunfrontare cara a cara cun totus chirchende cantas prus persones**



SU PROGETTU